

Acuerdo di huur entre Gobierno y SOGA den caso di hospital ta pa un periodo di 29 año

Diaranson pa 7'or di anochi Parlamento di Aruba a vota na favor di un cambio di ley pa asina gobierno por firma un acuerdo (huurovereenkomst) cu SOGA cu ta e fundacion cu ta bay guia y financia henter e proyecto di renobacion y expansion di dr. Horacio Oduber Hospital. E ley aki a keda aproba cu 14 voto na favor y 4 contra. Un amienda di fraccion di AVP cu ta regarda e mesun topico aki tambe a keda aproba. Minister de Meza a splica cu e acuerdo di huur entre gobierno y SOGA ta bay ta uno di 29 año. Stichting Onroerend Goed Aruba

'SOGA' ta existi algun año caba. Gobierno aki y esun anterior a haci diferente proyecto caba cu e fundacion aki. "Despues di a haci un analisis profundo con financia un proyecto asina grandi di casi 300 miyon florin a yega na e conclusion cu no ta facil pa gobierno riba su mes, for di su finanzas publico saca e cantidad di placa aki pa financia proyectonan grandi asina. Mescos ta e caso tambe pa e proyectonan Green Corridor y mudamento di APA pa Barcadera. No por saca e placa aki di begroting pasobra e ta bay pisa den un forma desproporcional riba presupuesto di

Aruba". De Meza a splica cu esaki ta motibo pakico Gabinete Mike Eman a bin cu diferente posibilidad. Un di nan ta e sistema PPP (Public Private Partnership) cu ta bay wordo uza den caso di Green Corridor y mudamento di waf. "Por mira e proyecto entre gobierno y SOGA den caso di renobacion y expansion di hospital tambe como un PPP caminda Stichting Ziekenverpleging Aruba mester percursa pa maneha hospital. E huurovereenkomst ta entre gobierno di Aruba y SOGA pa e duracion di 29 año y SZA ta haya e edificio den 'bruikleen' pa explota e op-



eracion di hospital". E proyecto aki no ta encera solamente e parti fisico di hospital, pero tambe hopi otro cambio riba diferente tereno cu ta necesario, manera un miho calidad di cuido, un SpoedEisende Hulp cu ta miho ekipa pa por brinda

miho asistencia, acomodacion di specialistanan y mucho mas. E proyecto ta uno hopi bon pensa y hinc den otro y ora e ta cla, Aruba tin un hospital moderno cu tur facilidad cu e tin mester.